

EUROOPASSA PUHALTAA KYLMIÄ TUULIA. OON AIKA LÄMPIMÄMÄLLE POLITIIKALE.

Met vihreät halvama olla lämmin ääni EY-parlamäntissä. Met olema vastapuolena ko kylmiä muukalaisviholisia tuulia vetelee Euroopan yli ja ulkoset rajat panhaan kiini häässä olevilta ihmisiltä. Ko met näemä hyökkäyksiä Praitiparatia vasthaan ja kunka asyliä hakevia ja roomia koheltahaan Euroopassa niin met tunnema lujasti, ette EY:ssä tarvithaan enämpi vihreitä politiikkoja. Met halvama tehdä työtä avoimen ja ihmislähheisen Euroopan eestä, jossa ihmisoikeuet jälleava kaikile – huolimatta siitä missä sie asut.

Klimattipolitiikassa EY oon tärkeän tienvalinan eessä. Konservatiiviset puolueet halvava antaa ylö korkeat klimattipäämäärät ja asettaa suuryritysten inträssit lasten tulevaisuuen etheen. Met vihreät halvama päinvastoin, ette EY ottaa vastuun ja taistelee klimattimuutoksia vasthaan. Siksi tarvithaan useampia vihreitä EY-parlamentaarikkeriä! EY saattaa olla klimattipolitiikan etupäässä mailmassa, mutta sillä oon merkitystä ketä politiikkoja sie olet äänestämässä framile.

Meän, vihreitten, vetovoima oon vastuun tunne meän lapsista ja lastenlapsista, ette net saava maholisuuhen hengittää puhasta ilmaa, jua ja uia puhthaassa veessä ja varttua ilman vaaralisiä kemikaalia kropissa.

EY-päätökset vaikuttavva sinun talrikilla olehvaan ruokhaan, tavahroin joita ostaat, internetin oikeukshiin, sinun maholisuuksiin liikkua Euroopassa, ja paljon muuhun. Met halvama, ette ruokasti oon vappaa myrkyistä eikä tule räkätyistä elläimistä. Met priuriteeraama helppojen junamatkojen satsauksia lennon ja muturiteitten siasta. Met halvama, ette plastiroskat käytethään uuesthaan sen sihaan ko, ette net joutuva roskina merhiin. Met sanoma ”ei” massavalvonalle ja ”joo” siihen, ette sulla oon oma kontrolli verkon henkilötoitten yli.

EY häätty keskittää työnsä niihin kysymykshiin, jotka toela oon yhtheisiä – klimattiuhka, rajanyliset miljööprupleemit ja ihmisoikeuksien puolesta nouseminen. Met miljööpuoluelaiset olema näyttäheet, ette met saatama tehdä eroa EY-politiikkaan. Kansalaisten ja kansanliikkeitten ja meän eurooppalaisten vihreitten ystävien kans met olema onnistunheet ohjaahmaan EY:n kalastuspolitiikkaa muuttaen sitä niin, ette se ensimmäistä kertaa oon asettannu päämääräksi kestävän kalakannan! Met olema parantanheet suoja vaaralisiä kemikaalia vasthaan ja kerta toisen perästä puolustanheet kansalaisten sanavaphautta ja inttimateettisuoja.

Miljööpuolueela oon kriittinen kanta siihen kunka EY oon rakenettu ja kunka se fynkeeraa. Siksi met tehämä työtä muuttaaksemme yniuunia. Met halvama parempaa syyniä EY:n päätösproshiin ja met halvama taistela julkisuusperiaatheen eestä EY:n laitokshiin.

Meilä oon se käsitys, ette päätökset häätyy tehä maholisiman likelä niitä, joita päätös koskee. Monet kysymykset, joista EY päättää, hantteerathan paremin kansalisela, alueelisela ja paikalisela tasola. Jäsenmaitten omat parlamäntit tartteva saa'a paremat maholisuuat tarkastaa, ettei EY tehe päätöksiä, joita niilä ei ole oikeus tehä.

Met halvama enämpi liikkuvuutta EY-yhtheistyöhön, jossa jokhainen yksityinen maa kohthuulisten rajojen sisälä saapi päättää missä osissa se halvaa olla myötä. Miljööpuolue ei halva, ette EY kehitty eurooppalaiseksi feterasuuniksi. Mutta met halvama, ette jokhainen Euroopan maa, joka täyttää perusvaatimukset koskien temokratiitä ja ihmisoikeuksia saapi liittyä EY:hyn.

MEÄN EHOKHAAT:

Isabella Lövin

”Meri ja ilma ei tunne rajoja. Jos met aijoma hantteerata suuria kokomailmalisia klimattiuhmauksia ja merimiljöötä niin EY oon meän paras kenttä saa'a muutoksia aikhaan. Seuraava iso klimattikokkous Parisissa 2015 tarjoaa mailmale maholisuuat. Ei kukhaan muu suurvalta tule othaan kärkeä, met halvama kattoo perhään, ette EY sen tekkee.”

”Mie halvan kans jatkaa työtä pareman merimijöön puolesta. Liikakalastus, merenhappaintuminen, liikalannotus, kemikaalien päästö ja laskiroskat ja Arkthiin suoja oon kaikki kysymyksiä, joita häätyy hantteerata niin EY:n ko kokomailmalisela tasola. Tämän eestä mie halvan tehä työtä. Mie tiän, ette EY-parlamäntti saattaa vaikuttaa muuttavasti, sinun äänesti oon siksi tärkeä!”

Peter Eriksson

”Temokratii ja avosuus oon tie. Tänä päivänä muurit kasuavva ympäröihvään mailhmaan. Aina useammat kysheenalaistavva jopa ihmisten maholisuuksia liikkua vaphaasti EY-maitten väliä. Se olis koloa takapakkia jos tämä tulis toelisuueksi.”

”EY saattaa kans asettaa tyhvimpiä vaatimuksia ja hommata selvempiä sääntöjä yksityisile maile vähentääksheen korypsuunia ja tiskrimineerinkiä. Sillä mallin sie saatat Euroopan parlamäntti-vaalin kautta vaikuttaa meän maanosan yhtheiskunthiin niin, ette niistä tullee enämpi sopivia ja toimivia.

Nyt sulla oon maholisuus käyttää sinun ääntä tehäksesi Eurooppaa vähäsen paremaks.

Muuta Eurooppaa, äänestä vihreästi.